

唐律疏議

陸潤庠題



唐律疏議

陸氏



光緒十
七年春
錢唐諸
可寶書

一九八四
年冬江
蘇廣陵
古籍刻
印社重印

齊律起義

世齊垌晉

義一齊洪

周錄五齊

欽定四庫全書提要

唐律疏義三十卷

唐太尉揚州都督趙國公長孫無忌等奉敕撰風俗通稱
舉陶謨虞造律尚書大傳稱夏刑三千周刑二千五百是
爲言律之始其後魏李悝著法經六篇一盜法二賊法三
囚法四捕法五雜法六具法商鞅受之以相秦漢蕭何益
戶興廢三篇爲九篇叔孫通又益旁章十八篇張湯越宮
律二十七篇趙禹朝律六篇合六十篇馬融鄭康成皆嘗
爲之章句魏世刪約漢律定增十九篇就故五篇合十八
篇晉復增損爲二十篇南北朝互有更改漸近繁密隋文
帝開皇三年敕蘇威牛宏等更制新律除死罪以下千餘
條定畱五百條凡十二卷一名例二衛禁三職制四戶婚

五廢庫六擅興七盜賊八鬪訟九詐僞十雜律十一捕亡
十二斷獄史稱其刑網簡要疏而不失唐太宗詔房元齡
等增損隋律降大辟爲流者九十二流爲徒者七十一而
大旨多仍其舊高宗卽位又命長孫無忌等偕律學之士
撰爲義疏行之卽是書也論者謂唐律一準乎禮以爲出
入得古今之平故宋世多採用之元時斷獄亦每引爲據
明洪武初命儒臣同刑官進講唐律後命劉惟謙等詳定
明律其篇目一準於唐至洪武二十二年刑部請編類頒
行始分吏戶禮兵刑工六律而以名例冠於篇首

本朝折衷往制垂憲萬年

欽定大清律例明簡公平實永爲協中弼教之盛軌臣等嘗伏讀
而紬繹之凡唐律篇目今所沿用者有名例職制賊盜詐

僞雜犯捕亡斷獄諸門其唐律合而今分者如戶婚爲戶
役婚姻寢庫爲倉庫廢牧鬪訟爲鬪毆訴訟諸門其名稱
異而實同者如衛禁爲宮衛擅興爲軍政諸門其分析類
附者如關津畱難諸條唐律入衛禁今析入關津乘輿服
御物事應奏不奏駟使稽程以財行求諸條唐律俱入職
制今分析入禮律之儀制吏律之公式兵律之郵驛刑律
之受贓謀殺入諸條唐律入賊盜今析入人命毆罵祖父
母父母諸條唐律竝入鬪訟今析爲兩條分入鬪毆罵詈
又姦罪市司平物價盜決隄防毀大祀丘壇盜食田園瓜
果諸條唐律俱入雜律今分析入刑律之犯姦戶律之市
廛田宅工律之河防禮律之祭祀蓋斟酌畫一權衡允當
迨今日而集其大成而上稽歷代之制其節目備具足以

沿波而討源者要惟唐律爲最善故著之於錄以見監古
立法之所自焉其書爲元泰定閒江西儒學提舉柳贊所
校刊每卷末附以江西行省檢校官王元亮釋文及纂例
亦頗可以資參訂也

可寶謹案法令之書傳於今者以唐律爲最古亦惟唐律
爲最善嘉慶中葉陽湖孫氏始刊入岱南閣叢書坊閒絕
少單行之本客夏貴策黃子壽方伯命書局重刻行世釋
文仍附卷末纂例則改冠諸門並以影宋抄律音義一卷
附後與元本洗冤集錄合訂同冊方伯移官鄂渚時尙未
畢工許爲序言亦未脫臺今書完而方伯已薨於位不及
觀成可勝悼歎爰綴數語以見因由光緒十有七年辛卯
陬月下旬江蘇補用知縣提調書局事宜錢塘諸可寶識

重刻故唐律疏議序

賜進士及第山東等處督糧道兼管德常臨清倉事務加二級孫星衍撰
律出於禮書呂刑曰伯夷降典折民惟刑班固以爲制禮以止
刑今文尙書家說唐虞象刑而民不犯三王始制刑辟荀子不
信之然夏刑條目僅見尙書大傳周公寓刑於禮不制刑書則
知孔子言道德齊禮謂上古之世善人爲邦勝殘去殺未可以
疑象刑之說矣秦焚經籍醫律幸存蕭何入關先收律令甄文
志載有李子三十二篇卽李悝法經其目有六略具唐律蓋蕭
何張蒼晁錯于定國及魏晉六朝名臣之所增定也兵法醫學
之書皆有淵源律令治體所關豈得不知沿革

國家輯四庫全書唐律疏議入於史部法令 祕府所藏世人
罕見偶得元刻本字畫精致鐫梓傳之附宋提刑洗冤錄於後

知檢驗濫觴之有本漢時董仲舒倪寬皆以經義決疑獄後漢郭躬陳寵世傳法律馬鄭諸儒爲之章句法者天下之平刑律不據經守古則以吏爲師專阿意指三尺之法一傾使民手足無所指有司不通律學則姦吏因緣爲市典文者無從別白禁抑或且變亂舊章損傷元氣是以漢課尉律魏置律博士始知蘇軾讀書不讀律之言非通論也自唐永徽定律已後宋元皆因其故惟明代多有更改又增姦黨一章以陷正士而輕其輕罪重其重罪或言輕罪愈輕則易犯重罪加重則多冤非善政也我

朝積德累仁與民休息幾致時雍刑措之治

列聖務行寬大之政故有改其盜爲原情免死之條增宮刑代從坐死刑之重

今上至仁天錫久道化成

特禁雖但從重之文復侵盜準徒之例合於哀矜折獄之義而舞文文致之風漸絕夫不讀唐律不能知先秦歷代律令因革之宜不足彰

聖朝立法之仁折衷之當星衍由翰林改官比部故公相阿文成曾厭例文繁複屬令刪除故司寇胡莊敏公遇疑難之獄手授平議宣布曹司嘗約爲

大清律音義蹉跎未就及權臬外臺頗平冤濫年逾五十智慮衰穢日從事尋章摘句之學思刊有用之書以貽同志賢於博弈義比餽羊若夫蠲除刪定而擇近古便民者以爲法程是在山甫蘇公明允之才宜

主恩以立明制非愚所及也太歲戊辰六月四日書於安德道

唐律疏議序

故唐律十二篇非唐始有是律也自魏文侯以李悝爲師造法經六篇至漢蕭何定加三篇總謂九章律而律之根莖已見曹魏作新律十八篇晉賈充增損漢魏爲二十篇北齊後周或併苞其類或因革其名所謂十二篇云者裁正於唐而長孫無忌等十九人承詔製疏勒成一代之典防範甚詳節目甚簡雖總歸之唐可也蓋姬周而下文物儀章莫備於唐始太宗因魏徵一言遂以寬仁制爲出治之本中書奏讞常三覆五覆而後報可其不欲以法禁勝德化之意皦然與哀矜愼恤者同符史官有司定律五百條分十二卷卽篇爲卷是已今定次三十卷者長孫製義疏時固已增多義疏出永徽初去貞觀應未遠其後定令刪格編式各隨世損益科條無藝大抵皆原於律矣然則

律雖定於唐而所以通極乎人情法理之變者其可畫唐而遽止哉國家立經陳紀迪德踐猷較諸近世之中稽合唐制爲多故凡垂之爲甲令著之爲事比無非忠厚惻怛之所形累聖重光何其甚似乎太宗也予嘗備數禮官陪在廷末議見吏抱成法寘前曰律當如是不當如彼雖辯口佞舌莫不帖帖順聽無敢出一語爲異及按而視之則本之唐以志其常參之祖宗睿斷以傳其變非常無古非變無今然而必擇乎唐者以唐之揆道得其中乘之則過除之則不及過與不及其失均矣嗚呼法家之律猶儒者之經五經載道以行萬世十二律垂法以正人心道不可廢法豈能以獨廢哉彼謂除參夷連坐之罪作見知部主之條爲蕭張控制天下之一術其論抑淺末矣予何足以知之因其理之在人心者而竊窺之耳江西在聲教漸濡之內

諸學經史板本略具而律文獨闕予間請於廉訪使師公曰禮
刑其初一物出禮入刑之論固將以制民爲義而非以罔民爲
厲也吾欲求故唐律疏義稍爲正訛緝漏刊之龍興學官以庶
幾追還時會讀法之遺公儻有意乎公亟謀諸寮案咸應曰諾
而行省檢校官王君長卿復以家藏善本及釋文纂例二書來
相其役公欣然命出公帑所儲沒入學租錢以供其費踰月緒
成因執筆冠篇而且以識公恤刑之本心無往而不在也若曰
鑄刑鼎作爰書以取譏於世則予豈敢泰定四年秋七月旣望
文林郎江西等處儒學提舉柳贊謹序

律起於黃鍾權衡度量生焉是律者法度之所自出故刑
名家亦謂之律五等之刑銖較絲比權輕重時損益與天
地之氣相爲貫通陽一嘘而萬物生陰一吸而萬物死故
古人謂未押字以前屬陽押字以後屬陰陽陰不在天而
在我是故先王慎之唐虞畫衣冠而民不犯成周司馬敎
民讀法亦象刑遺意子產鑄刑書而叔向乃非之蓋懼其
棄禮忘義而一徵於書則薄矣漢興三章之約不足以治
天下故命蕭何制律後世酌而行之國家律書未頒比例
爲斷然例本於律參其意不泥其文爾汴梁人王長卿精
刑名之學以唐律析爲橫圖用太史公諸表式經緯錯綜
成文五刑三千如指諸掌其用心亦仁矣哉雖然德禮本
也政刑末也善用者德禮行乎政刑之間不善者反此故

曰有關雎麟趾之意然後可以行周官之法度余請以此
爲唐律纂例序泰定二年乙丑秋七月下弦日眉山劉有
慶謹序